

~~F 9150/3532.2(3)~~

CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

APR 15 1952

F 9100/3533(66)

03

續集  
上

癸  
辛  
雜  
識

第  
三  
卷

六  
六



三

癸辛雜識續集目錄上

羅椅

大打圍

水竹宮

宋彥舉鍼法

華夷圖石

縉雲葉醫

洪蕖

插花種菊

大野猪

天花異

西城玉山

靈壽杖

改安吉州

二王入閩大略

海船頭髮

海神擎日

哈佛大學哈佛東  
圖書館珍藏印



27

癸辛雜識

續集目上一

及古同

戊子地震

江西術者奇驗

京口天裂

李醉降僊

海井

狗畏鼻冷

鑿井法

重窖

日形如瓠

葉李遭黥

地連震

蜀人不浴

梅無仰開花

柵沙武口

李仲賓談鬼

大興獄鬼

梨酒

四明延壽寺火

合樂諧和

盜馬踏淺

于闐玉佛

狗站

姨夫眼眶

偏僻無子

琴應弦

治物各有法

金鳳染甲

杭城食米

開慶六士

范元章夢

福王婚啓

雷雪

醫術

湖翻

回回沙磧

短蓬

子山隆吉

塞材望

船吼

古獄塔燈

成都惡事

馮婦搏虎義

鹽養花

文山像贊

王茂林立子

回回送終

接待寺

天雨塵土

宋江三十六贊

種葡萄法

插瑞香法

楊髡發陵

西征異聞

嘲雷忠齋

鎖陽

純色骰錢

公主添房

聖門本草

海鱧兆火

壬辰星隕

葉李紀夢詩

海蛆

北方大車

全氏孿鬼

押不盧

種茯苓

葉李姓名二十

訟學業背社

相馬法

碑蓋

駝峰

解厄呪

霍山顯靈

黃蘆城幹

癸辛雜識續集目錄上終

癸辛雜識續集上

宋 弁陽 周密 輯

明 海隅 毛晉 訂

羅椅

羅椅字子遠號礪谷廬陵產也少年以詩名高自標致常以詩投後村有華裾客子袖文過之句知其為巨富家子也壯年留意功名借徑勇爵捐金結客馳名江湖時方向程朱之學於是盡棄舊習而學焉然性理之學必須有所授然後名家於是

尊饒雙峰爲師時四方從之者數百類多不能文  
之人子遠天資素高又濟之以性理之學竟爲饒  
氏高弟其實欲蓋陶猗之名也未幾以李之格薦  
登賈師憲之門久之賈惡其不情心薄之時在江  
陵值庚申透渡之事遂去賈往維揚依趙月山起日  
遂青鞋破袴蓬頭垢面儼然一貧儒也月山得其  
銜袖之文甚喜遂延之教子賓主極相得未幾師  
憲移維揚月山仍參闈幕一日話間云兒輩近得  
一師善教導蓋廬陵羅兄也才美可喜但一貧可

念也師憲先廉知爲子遠詒月山云好秀才教  
子弟極難得願見其人月山遂拉子遠出見之師  
憲爲之絕倒月山茫然問所以師憲曰此江西羅  
半州也其家富豪十倍於我輩執事高明乃爲所  
欺耶月山甚慚子遠知踪跡已露遂告別而去既  
而登丙辰第以秉義郎換文林爲江陵教又改潭  
教潭之士聞其來先懷輕侮之意及至首講中庸  
亶亶可聽諸生乃無語及宰顛之信豐登畿爲提  
轄權貨務賈師憲知其平生素詭詐不然之久

而不遷至度宗升遐失於入臨於是臺評論罷而去饒雙峰者番陽人自詭爲黃勉齋門人於晦菴爲嫡孫行同時又有新淦董敬菴韓秋巖皆爲雙峰門人子遠與之極相得互相稱道及世變後道學旣掃地董韓再及門則子遠不復納之矣董韓亦行怪者俱不娶雙峰死二君匍匐往哭縞素背負木主每夕旅邸輒設位奉木主哭臨之旅主人皆患苦之及道由撫州黃東發震時爲守津吏報云有二秀才素衣背位牌入界大哭而去行止怪

異不知何人東發聞之卽往迎之亦製服於郡廳設位三人會哭俱稱先師之喪及自石洞回東發聘董爲臨汝堂長書幣極厚留韓郡齋蓋一時道學之怪往往至此時人有言云道學先牌人慾行董敬菴淦之浮薄者鄉人呼爲董苟菴韓自詭爲魏公之裔僻居菴屋而榜帖則必稱本府常語朋友云先忠獻王勳德在國史先師文公精神在四書諸賢不必對老夫說功名說學問以此往往爲後生輩所譏云

大打圍

北客云北方大打圍凡用數萬騎各分東西而往  
 凡行月餘而圍始合蓋不啻千餘里矣既合則漸  
 束而小之圍中之獸皆悲鳴相弔獲獸凡數十萬  
 虎狼熊羆麋鹿野馬豪猪狐狸之類皆有之特無  
 兔耳獵將竟則開一門廣半里許俾餘獸得以逸  
 去不然則一網打盡來歲無遺種矣又曰未獵之  
 前隊長去其頭帽於東南方開放生之門如隊長  
 復帽則其圍復合衆始獵耳此亦湯王祝網之意

也

水竹居

薛野鶴曰人家住屋須是三分水二分竹一分屋  
 方好此說甚奇

宋彥舉鍼法

趙子昂云北方有宋彥舉者鍼法通神又能運氣  
 謂初用鍼即時覺熱自此流入經絡頃刻至患處  
 用補瀉之法治之則病愈而氣血流行矣  
 劉漢卿郎中患牙槽風久之頷穿膿血淋漓醫皆



不効在維揚有丘經歷益都人妙鍼法與鍼委中  
及女膝穴是夕膿血卽止旬日後頷骨蛻去別生  
新者其後張師道亦患此證亦用此法鍼之而愈  
殊不可曉也丘嘗治消渴者遂以酒醪作湯飲之  
而愈皆出於意料之外  
委中穴在腿腠中女膝穴在足後跟俗言丈母腹  
痛灸女婿脚後跟乃舛而至此亦女膝是也然灸  
經無此穴又云女須穴

### 華夷圖石

汴京天津橋上有奇石大片有自然華夷圖山青  
水綠河黃路白粲然如畫真異物也今聞移置汴

京文廟中作拜石

伯幾月  
觀皆云

### 縉雲葉醫

括之縉雲有葉醫挾術頗精一夕忽夢追至城隍  
主者戒云凡今北之人虐南人蓋有數若南人恃  
北執以虐南人者此神明之所甚怒罪無赦趙某  
者昔在福州日殺人至多獲罪於天今使之得音  
疾而死或以穀二石酒二斗雞四隻相邀汝慎毋

往不然逆天之罪不可違也然於次日必有葉氏亦以此數相償且有重獲也既覺惴惴然遂往廟中炷香甫歸家而趙氏之家令人果以物至相邀遂辭以疾不往次日葉府召醫疾愈以物酌謝乃雞酒穀如夢中之數收功獲謝而趙則殂矣

蔡蓮潛云

### 洪渠

高疎寮守括日有籍妓洪渠者慧黠過人一日歌真珠簾詞至病酒情懷猶困懶使之演其聲若病酒而困懶者疎寮極稱賞之適有客云卿自用卿

法高因視洪云吾亦愛吾渠遂與脫籍而去以此得嘖言者

### 插花種菊

春花已半開者用刀翦下卽插之蘿蔔上却以花盆用土種之時時澆溉異時花過則根已生矣既不傷生意又可得種亦奇法

沈草庭云

梅雨中旋摘菊叢嫩枝插地下作一處以蘆蓆作一棚高尺四五覆之遇雨則除去以受露無不活者且叢矮作花可觀上盆尤佳

大野猪

北方野猪大者數百斤最獷悍難獵每以身指松樹取脂自潤然後臥沙中傅沙於膏久之其膚革堅厚如重甲名帶甲野猪雖勁弩不能入也其牙尤堅利如戟馬至則以牙梢之馬足立傷雖虎豹所不及也又云獵犬之良者最畏狐蓋狐善以穢氣薰犬目即瞽收獵者凡見狐必收犬蓋恐為所損也

胡德齋

天花異

戊子五月初二日以來日光中有若柳絮如雪片片者飛舞亂下人皆闕傳以為天花者至初四日大雷雨飛雹大者如當三錢始知連日所謂天花者即雪也及飛下人則以雹耳蓋小片半空已化於烈日中大者乃乘風而墜耳繼聞沈氏失冰一窰次日王子才自越來則知越中端午日大電西廊門雪亦失其半按寧宗嘉定甲戌九月朔日食之既日傍有星見及有飛片如雪母之狀自天飄下今之天花殊類此也

西域玉山

劉漢卿嘗隨官軍至小回回城去燕數萬里每雨過山泥淨盡數百里間皆玉山相照映碧澱子皆高數尺豈所謂瑯玕者耶

靈壽杖

又云靈壽杖出西域自黃河隨流而出不知為何木其輕如竹而性極堅韌又有蘋柳色如紅玉亦可為杖能辟雷每雷作時杖頭皆有火光殊不可曉又有大桃核如升可以破而為碗皆自黃河流

韌而振切說文柔而固也

下不知何國物也

改安吉州

或言湖州以潘丙之事改名安吉州乃寓潘丙二字史相之狡獪也

二王入閩大略

德祐丙子正月十二日之事陳丞相宜中與張世傑皆先一日逃往永嘉次日蘇劉義張亮節張全挾二王及楊俞二妃行自漁浦渡江繼而楊駙馬亦追及之至婺駙馬先還二王遂入括既而陳丞

相遣人迎二王竟入福州丁丑五月朔於福州治立益王即吉王方八歲改元景炎立之日眾方立班忽有

聲若兵馬至者眾驚甚久乃止益王銳下一目幾

眇是歲大軍至遂入廣州至香山縣海中大戰而

勝奪船數十艘繼而北軍再至遂致敗績益王墜

水死陳宜中自此逃去竟莫知所之繼又至雷州

駐碭洲屬雷州界立廣王後封衛王俞妃所生貌類理宗即位之

日有黑龍見兩足一尾改號祥興至已卯歲二月

北軍大至戰于厓山初以乏糧遣心腹賫銀上岸

糴米至是眾船出海口迎戰而所遣者未還張世

傑云若棄之而去後來何以用人遂決計不動遂

決戰自曉至午南北皆倦欲罷平日潮信凡兩時

即退適此日潮終夕不退北軍雖欲少退而潮勢

不可遂死戰南軍大潰王及樞密使陸秀夫字君實

楊亮節皆溺海而死焉時二月六日也此役也皆

謂蘇劉義實著忠勞云姜大成云

海船頭髮

澈浦楊師亮航海至大洋忽天氣陡黑一青面鬼

躍入舟中繼有一美婦人至顧左右取頭髮舟人皆辭以無婦人顧鬼自取之卽於船板下取一籠啓之皆頭髮也婦人揀數束而去

海神擊日

揚州有趙都統號趙馬兒嘗提兵船往援李壇於山東舟至登萊殊不可進滯留凡數月嘗於舟中見日初出海門時有一人通身皆赤眼色純碧頭頂大日輪而上日漸高人漸小凡數月所見皆然

戊子地震

至元二十五年戊子歲冬十月二十四日丙子夜正中地大震始如暴風駕海潮之聲自西南來雞犬皆鳴窻戶磔磔有聲繼而屋瓦皆搖勢若掀箕余初聞是聲大驚以爲大寇至懼甚噤不敢出息繼而覺臥榻撼如乘舟迎海潮始悟爲地震也遠近皆喧呼或以爲火凡兩茶頃甫定次日親朋皆相勞問互言所聞至十一月初九日庚辰辰時又震余向於庚子歲時先子畱富沙曾經此變乃晡時杭雪則在二鼓後此理不可曉

江西術者奇驗

咸淳甲戌之春余爲豐儲倉久以病疴不出忽聞賈師憲丁母憂而出凡朝紳以至景局皆往唁奠送之江干同官曾昭陽來問疾因及此事云師憲旦夕必再來余曰此公請歸之章凡十餘今適有此必不復來矣曾曰江西一術者其言極神前日來嘗扣之云此人不出今歲必再來尚可洗日一番然自此以往凶不可言矣余深不以爲然至秋度宗升遐繼而有潰師亡國之禍果如其言惜當

時不曾扣問術者姓名也

天裂

咸淳癸酉十月李祥甫庭芝自江陵被召至京口一日午後忽見天裂見其中軍馬旗幟甚衆始紅旗繼而皆黑旗凡一茶頃乃合見者甚衆

趙德潤

李醉降仙

應山在淮閩日呂少保薦一術士能降仙豪於飲號曰李醉施州人凡有所禱祈令人自書一紙實卷之以香一片令自祈禱且自緘封書押并金紙

一百焚於香爐中然後索酒痛飲多至四五斗乃  
濃墨大書或草或畫卦影或賦詞詩之類多至數  
十紙皆粲然可讀其答所問往往多驗一日應山  
密書以扣襄樊之事醉後大書十字云山下有朋  
來土鼠辭天道每字徑尺餘至甲戌歲度宗升遐  
解者謂度宗庚子生納音屬土所謂土鼠者耶德潤

海井

華亭縣市中有小常賣鋪適有一物如小桶而無  
底非竹非木非金非石既不知其名亦不知何用

如此者凡數年未有過而睨之者一日有海舶老  
商見之駭愕且有喜色撫弄不已叩其所直其人  
亦駟黠意必有所用漫索五百緡商嘻笑償以三  
百卽取錢付駟因叩曰此物我實不識今已成交  
得錢決無悔理幸以告我商曰此至寶也其名曰  
海井尋常航海必須載淡水自隨今但以大器滿  
貯海水置此井於水中汲之皆甘泉也平生聞其  
名於番賈而未嘗遇今幸得之吾事濟矣

狗畏鼻冷



狗最畏寒凡臥必以尾掩其鼻方能熟睡或欲其夜警則翦其尾鼻寒無所蔽則終夕警吠

### 鑿井法

北方鑿井動輒十餘丈深尚未及泉爲之者至難或泉不佳則費已重矣後見一術者云凡開井必用數大盆貯水置數處俟夜氣明朗於盆內觀所照者星光何處最大而明則地中必有甘泉也試之屢驗

伯機

### 重窖

自兵火以來人家凡有窖藏多爲奴僕及盜賊軍兵所發無一得免者獨聞一貴璫家獨有窖藏之妙法須穿土及其下置多物訖然後掩其土石石上又覆以土復以中物藏之如此三四層始加甃砌異日或被人發掘止及上層見物卽止却不知其下復有物也多者儘藏於下此說甚奇

### 日形如瓠

范元章聞之本心翁謂曾見錢浩達可云戊子十月內早出郭日初出略無精光其形如瓠旣而變

方乃就圓殊不可曉也

葉李遭黥

葉亦愚上書後朝廷捕之甚急遂禱之霍山張王廟是夕夢一白衣裹帽人指庭下一雞爲蛇所纏牢不可解其後有黥而王之驗二物已酉合也

地連震

紹定戊子八月初三日二鼓雷雨之聲自東北來地遂震四鼓再震九月十三日夜又震謝密菴云春秋二百四十二年地震者五今連及三震焉其

後嘉熙庚子地震戊子歲十月地震十一月又震却一甲子矣

蜀人不浴

蜀人未嘗浴雖盛暑不過以布拭之耳諺曰蜀人生時一浴死時一浴

梅無仰開花

杜南谷云梅花却無仰開者蓋亦自能巧避風雪一驗之信然

柵沙武口

軍未渡之時守把統制官王順欲柵沙武口及  
一口以此二處江水極深難於用工遂用披搭敝  
舟百餘隻載沙石沉之繼以石筲土囊壓下就用  
檣竿打爲樁柵不兩日卽辦蓋長江之險此二處  
最爲要害故也夏貴乃以爲不然遣人盡去樁柵  
欲縱北船入口然後與戰順極以爲憂請披搭船  
三百隻左右前後皆置棹先棹以迎之俟彼船出  
口子卽以鐵猫兒冑定復回棹拽其船以歸蓋口  
子旣小自不容竝進不過盡入吾窰中乃已夏老

復忌其功不以爲然及北船盡出之後散漫大江  
之中守兵僅能與未去口子者相拒而餘舟皆已  
飛渡滸廣矣

李仲賓談鬼

李仲賓衍父少孤貧居燕城中荒地多枸杞一日  
踰隣寺頽垣往采杞子日正午方行百餘步忽迷  
失故道但見廣沙莽莽非平日經行境界心甚異  
之舉頭見日色昏猶能認大悲閣爲所居之地遂  
向日南行循閣以尋歸路忽見一壯夫白帶方巾

步武甚健厲聲問往何方方錯愕間遽以手捽其胸李素多力善搏急用拳捶之其人仆已失其首心知爲鬼物然猶踟躕相向李復以拳仆之隨仆隨起者十餘次其人遂侶怒而去旣稍前則無首者踞坐大石上以俟意將甘心焉然路所必經執不容避忽記腰間有采杞之斧遂持以前其人果起而迎之遂斧其頸鏗然有聲乃在青石上其人寂然不見而異境亦還元觀乃私識其處而歸家人見其神采委頓問之則不能語越宿方能道所以遂偕數人往訪其處果有斧痕在石上遂啓其石下乃智井井中皆枯骸也詢之蓋亡金兵亂中死者遂函其骨遷窆他所後亦無他

大興獄鬼

仲賓又云向在燕爲太常令史太常官廨向爲大興獄聞有物怪往往能殺人時年少氣壯勇方秋初一夕守宿官舍一僕自隨亦以暑甚出外舍遂獨據炕酣寢至夜半忽房門軋然有聲而開驚覺則胸間憤悶若壓氣不甦醒極力微開目見一人

黑色乘微月率率有聲而前既進復退於是恐甚極力瞠目起坐則房門未嘗啓也頃之其人復來思有以禦之適無他物僅有皮靴一雙於其前俟其稍近以靴擲之劃然有聲如雉鳴用手斜拉窓眼而去至曉觀之其手拉窓處每窓眼皆圓竅數十破處皆如一紙雖破而不脫竟不知爲何怪也

梨酒

仲賓又云向其家有梨園其樹之大者每株收梨二車忽一歲盛生觸處皆然數倍常年以此不可

售甚至用以飼猪其賤可知有所謂山梨者味極佳意頗惜之漫用大甕儲數百枚以缶蓋而泥其口意欲久藏旋取食之久則忘之及半歲後因至園中忽聞酒氣熏人疑守舍者釀熟因索之則無有也因啓觀所藏梨則化之爲水清冷可愛湛然甘美真佳醞也飲之輒醉回回國葡萄酒止用葡萄釀之初不雜以他物始知梨可釀前所未聞也

四明延壽寺火

四明延壽寺在城大刹也三十年前僧良月溪者

爲知客一夕夢本寺所奉四明尊者告之曰三十年後當使瓦礫化爲黃金適符吉夢至明年己丑正月初四日乃四明尊者忌辰作會次日戴覺民家火作延燎寺中一椽不留其應乃如此先是一月前有汪氏子名信道者夢其祖宗云火災當起於汝家吾力告免於神今已得一同姓名者代矣及火作乃起於戴氏闈人汪信之家與信道僅有一字之異所毀幾萬家凡壬午年火所不及者皆不得免其新舊界址截然若有神所司者此尤可

怪云

合樂諧和

嘗聞梨園舊樂工云凡大燕集樂初作必先奏引子謂如大石調引子則自始至終凡絲竹歌舞皆爲大石調直至別奏引子方隨以改爲耳又云凡燕集初作或用上字然或用工字然必須衆樂皆然是謂諧和或有一時煞尾參差不齊則謂之不和必有口舌不樂等事前後驗之無不然者以此推之則樂之關乎治亂爲不誣矣

盜馬踏淺

甲戌透渡之事其先乃因淮閩遣無鼻孔回回潛渡江北盜馬或多至二三百匹其後遂為所獲遂扣其渡江踏淺之處乃自陽羅堡而來於是大江可涉地北盡知之遂由其處而渡焉

于闐玉佛

伯顏丞相嘗至于闐國開省於其國中開井得白玉佛一身高三四尺色如截肪照之皆見筋骨脈絡已即貢之上方又有白玉一段高六尺闊五尺

長一十七步即長八丈五寸也以重不可致

狗站

伯機云高麗以北地名別十八華言乃五國城也其地極

寒海水皆冰自八月即合直至來年四五月方解人物行其上如履平地站車往來悉用四狗挽之其去如飛其狗悉諳人性至站亦破狗分例稍不如儀必至嚙死其人

姨夫眼眶

席音望令史河間人其妻常為白衣男子所據來則

痛飲然後共寢帟不勝其忿於是仗利刃伺於牀  
下既而果來擁婦劇飲大醉方欲就睡掩其不備  
以刃刺之白衣沿壁而上躡捷如飛因逆刃搶殺  
之墮地化爲霜毛白鼠身長五尺許雙目爛然遂  
抉其目珠色深碧而徑寸宛似瑟瑟夜至暗室有  
光芒尺餘北人戲名曰姨夫眼眶蓋北人以兩男  
子共狎一妓則呼爲姨夫故以爲戲云

伯機

### 偏僻無子

施仲山云士大夫至晚年多事偏僻之術非惟致

疾然不能有子蓋交感之道必精與氣接然後可  
以生育而偏僻之術必加繫縛之法氣不能過是  
以不能有子也愛身者當慎之

### 琴應絃

琴間指以一與四二與五六四與七爲應今凡動  
第一絃則第四絃自然而動試以羽毛輕織之物  
果然此氣之自然相感動之妙

紫霞翁

### 治物各有法

金花定碗用大蒜汁調金描畫然後再入窰燒之



永不復脫凡玉工描玉用石榴皮汁描之則見水  
不去壘珠相思子磨汁綴之白芨亦可則見火不脫凡  
事皆有法

### 金鳳染甲

鳳仙花紅者用葉搗碎入明礬少許在內先洗淨  
指甲然後以此付甲上用片帛纏定過夜初染色  
淡連染三五次其色若胭脂洗滌不去可經旬直  
至退甲方漸去之或云此亦守宮之法非也今老婦七  
人旬者亦染甲今回回婦人多喜此或以染手并猫狗為

### 戲

#### 杭城食米

余向在京幕聞吏魁云杭城除有米之家仰糴而  
食凡十六七萬人以二升計之非三四千石不  
可以支一日之用而南北外二廂不與焉客旅之  
往來又不與焉

#### 開慶六士

陳宜中曾唯黃鏞劉黻陳宗林則祖皆以甲辰歲  
史嵩之起復上書倡為期之論一時朝紳如盧越

徐霖元杰趙無墮皆和之時人號爲六君子旣貶旋還時相好名牢籠宜中爲倫魁餘悉擢巍科三數年間皆致通顯然夷攷其人平日踐履殊有可議者然同聲合黨孰敢撓其鋒郭方泉閫在臺日嘗疏黃鏞之罪因論虛名之弊時宜中在政府黻在從班競起攻之閫爲之出臺及鏞知廬陵文宋瑞起義兵勤王百端沮之遂成大隙旣而北兵大入則如黃如曾數公皆相繼賣降或言其前日所爲皆僞也於是<sub>有爲之語云</sub>開慶六君子至元三午之清談也

### 范元章夢

范元章向者魏明已館中嘗赴省試夢至大宮殿手執文書歷階而上自顧其身則挂綠衣旣而有衣皂褶者亦欲進爲左右所却以爲無綠衣而不可進范遂脫所衣綠袍與之其袍內乃著粉青戰袍旁有嘲之者答云無笑此乃銀青袍也及寤雖喜衣綠之吉又有脫袍之疑旣而中第辭魏氏館

繼之者乃蜀人稅某也次舉亦第於是脫袍之徵已驗獨不曉銀青之說然自喜以爲此必異時所至之官也臨安鹽倉批滿則謝堂實尹京其銜乃銀青光祿大夫時事已異僅止於此是以知人生皆有分定不容少有僥倖也

福王婚啓

福王之子娶全竹齋少保之女婚書一聯云依光薊北苟安公位之居回首江南惟重母家之念亦有味也時福王爲平原郡公

雷雪

至元庚寅正月二十九日癸酉是年二月三日春分余送女子嫁吳氏至博陸早雪作至未時電光繼以大雷雪下如傾而雷不止天地爲之陡黑余生平所未見爲驚懼者終日客云記得春秋魯隱公九年三月三國吳主孫亮太平二年二月晉安帝元興三年正月義熙六年正月皆有雷雪之變未及考也

醫術

吾鄉醫者龐良臣良材兄弟二人指上頗明最是暗記諸藥方不差分毫爲難能也永嘉術者陳獨步瞽而善記每有客自外來聞其聲卽知其爲何人也誦言一別今幾何歲矣台庚乃某年某月日時者乎略無一差吾鄉張神鑑亦瞽而善紀胸中所儲無慮數萬每談一命則旁引同庚者數十皆歷歷可聽又有張五星亦瞽而慧善辨寶玉此猶是暗中摸索至於能別婦人妍醜聞其聲欬扣問數語卽知其人美惡情性趙信國丞相專俾置姬

妾并玉器云

湖翻

庚寅五月連雨四十日浙西之田盡沒無遺農家謂尤甚於丁亥歲雖景定辛酉亦所不及也幸而不沒者則大風駕湖水而來田廬頃刻而盡村落名之曰湖翻農人皆相與結隊往淮南趁食於太湖買舟百十餘所載數千人同往甫至湖心大風驟至悉就溺死又有千餘人渡楊子江濟者同日亦沉于江淨慈靈隱皆停堂客僧數百皆渡江還

浙東內四僧偶別門徒至中途忘攜雨具還取之  
至江干則渡舟解維矣方悵然自失舟至中流亦  
爲風浪所覆四僧幸而得免豈非所謂劫數者耶

### 回回沙磧

回回國所經道中有沙磧數千里不生草木亦無  
水泉塵沙眯目凡一月方能過此每以鹽和麵作  
大饅置橐駝口中仍繫其口勿令噬嗑使鹽麵之  
氣沾濡庶不致餓死人則以麵作餅各貯水一盂  
於腰間或牛羊渾脫皮盛水置車中每日略食餌餅濡之以水

或迷路水竭太渴則飲馬溺或壓馬糞汁而飲之  
其國人亦以爲如登天之難今回回皆以中原爲  
家江南尤多宜乎不復回首故國也

### 短蓬

楊大芳嘗爲明州高亭鹽場場在海中或天時晴  
霽時見如匹練橫天其色淡白則晴雨中分土人  
名之曰短蓬亦蜃氣之類也

### 子山隆吉

梁棟字隆吉鎮江人登第嘗授尉與莫子山甚稔

一日偶有客訪子山留飲作菜元魚爲饌偶不及棟棟憾之遂告子山嘗作詩有譏訕語官捕子山入獄久之始得脫而歸未幾病死余嘗挽之云秦邸獄成盃酒裏烏臺禍起一詩間紀其實也後十年棟之弟投茅山許宗師爲黃冠許待之厚旣而棟又欲挈妻孥而來許不從棟遂大罵之許不能堪遂告其曾作詩云浮雲暗不見青天指以爲罪於是捕至建康獄未幾病死此恢恢之明報也

蹇材望

蹇材望蜀人爲湖州倅北兵之將至也蹇毅然自誓必死乃作大錫牌鐫其上曰大宋忠臣蹇材望且以銀二笏鑿竅併書其上曰有人獲吾屍者望爲埋瘞仍見祀題云大宋忠臣蹇材望此銀所以爲埋瘞之費也日繫牌與銀於腰間只伺北軍臨城則自投水中且遍祝鄉人及常所往來者人皆憐之丙子正月旦日北軍入城蹇已莫知所之人皆謂之溺死旣而北裝乘騎而歸則知先一日出城迎拜矣遂得本州同知鄉曲人皆能言之

船吼

甲戌歲越中榮邸兩舫舟忽有聲如牛吼移時方止俗謂之船吟不祥之徵也未幾有透渡之禍庚寅歲十一月朔西興渡以舟子不謹驅趁渡人上沙太早既而潮至趨岸不及溺死者近百人時王篠竹孫小隱同問渡目覩其事以鈔一錠命舟僅救三人孫遂以事白省遂斷兩監渡官各一百七下梢人則處典刑以謝溺者既而渡口之舟復大吼豈溺者有知而然邪

古獄塔燈

武林右司理院昔爲僧寺有大石塔在焉風雨陰晦之夕或現一燈於上則府主必移易獄有故甲戌歲范元章攝右獄日親見之此燈或多至六燈兩兩相竝於塔之半其色淡紅而微青凡數見之

成都惡事

魏明已之姪有六直閣者云少年在成都時方承平繁盛與京師同一日入酒肆中坐覺卓下有所遺物如鑰匙之狀極其光瑩俱各不等凡數十枚

莫曉其爲何物姑收置之佩囊中因遊狹斜至深夜方歸忽有三四少年揖於道旁爲禮甚恭然皆平生素昧者力邀於酒肆中堅辭不可酒再行乃出向所得如鑰之物見還云某輩不知先生在此輒犯不韙茲謹納還然所願受教於明師魏聞其言略不知所謂亦不知此爲何物亦莫知緣何爲其所取辭以偶爾得之初不知爲何用而衆猶不信久而乃散及扣黠者則知此物探囊胠篋之具此數輩適得之於魏疑其爲高手盜也欲師之耳

魏懼賈禍亟毀棄之久而不敢出市云

范元章

### 馮婦搏虎義

孟子馮婦搏虎一章有以昔人有馮婦者善搏虎卒爲善士則之爲斷句攘臂下車衆皆悅之其爲士者笑之與前段相對亦自有義

### 鹽養花

凡折花枝搥碎柄用鹽築令實柄下滿足插花瓶中不用水浸自能開花作葉不可曉也

### 文山像贊



有傳鄧光薦贊文山像云目煌煌今疎星曉寒氣  
英英兮晴雷殷山頭碎柱而壁完血化碧而心丹  
嗚呼誰謂斯人不在世間

祝靜得

### 王茂林立子

王克謙號茂林無子後知永嘉命立修竹爲子時  
已二十乃戊戌生本姓林氏正合茂林二字非偶  
然也

### 回回送終

回回之俗凡死者專有浴屍之人以大銅甌自口

灌水蕩滌腸胃穢氣令盡又自頂至踵淨洗洗訖  
然後以帛拭乾用紵絲或絹或布作囊裸而貯之  
始入棺斂棺用薄松板僅能容身他不置一物也  
其洗屍穢水則聚之屋下大坎中以石覆之謂之  
招魂置卓子坎上四日一祀以飯四十日而止其  
棺卽日便出瘞之聚景園園亦回回主之凡賃地  
有常價所用磚灰匠者園主皆有之特以鈔市之  
直方殂之際眷屬皆髣面捽披其髮毀其衣襟躡  
踊號泣振動遠近棺出之時富者則丐人持燭撒

果於道貧者無之既而各隨少長拜跪如俗禮成服者然後帖靴尖以樂相慰勞之意止令群回誦經後三日再至瘞所富者多殺牛馬以饗其類併及隣里與貧丐者或聞有至瘞所脫去其棺赤身瘞於穴以死面朝西云

辛卯春於瞰碧目擊其事

### 接待寺

杭之北關接待寺寺額乃吳傅朋書敕賜妙行之院初扁甚小其後展而大之殊乏書體其右廡有古觀音殿亦傅朋書極佳觀音銅像高丈餘唐物

也其一壁作水波有洶湧勢若毗陵太平寺之類外有給庫石碑立於側其文乃銛朴翁撰姜堯章書伽藍神左相公不知何代人寺乃淳熙間喻彌陀開山常施水飯僧於此有大石井尚存其深六丈泉極清冽喻有塔頭在法堂之左題云齋三百萬僧喻彌陀之塔云

### 天雨塵土

辛卯三月初六日甲辰黃霧四塞天雨塵土人人鼻皆辛酸几案瓦墮問如篩灰相去丈餘不可相

覩日輪如未磨鏡翳翳無光采凡兩日夜是夜二  
鼓望仙橋東牛羊司前居民馮家失火其勢可畏  
凡數路分火沿燒至初七日勢益盛而塵霧愈甚  
昏翳慘淡雖火光烟氣皆無所覩直至午刻方息  
南至太廟墻北至太平坊南街東至新門西至舊  
祕書省前東南至小堰門吳家府西南至宗正司  
吳山上嶽廟皮場星宿閣伍相公廟東北至通和  
坊西北至舊十三灣開元宮門樓所燒踰萬家至  
今恰一甲子矣客云漢成帝建始元年後周宣帝

陳後主禎明中皆有黃霧之變未及考也

### 宋江三十六贊

龔聖與作宋江三十六贊并序曰宋江事見於街  
談巷語不足采著雖有高如李嵩輩傳寫士大夫  
亦不見黜余年少時壯其人欲存之畫贊以未見  
信書載事實不敢輕爲及異時見東都事略載  
侍郎侯蒙傳有書一篇陳制賊之計云宋江以三  
十六人橫行河朔京東官軍數萬無敢抗者其材  
必有過人不若赦過招降使討方臘以此自贖或

可乎東南之亂余然後知江輩真有聞於時者於是卽三十六人人爲一贊而箴體在焉蓋其本撥矣將使一歸於正義勇不相戾此詩人忠厚之心也余嘗以江之所爲雖不得自齒然其識性超卓有過人者立號旣不僭侈名稱儼然猶循軌轍雖託之記載可也古稱柳盜跖爲盜賊之聖以其守壹至於極處能出類而拔萃若江者其殆庶幾乎雖然彼跖與江與之盜名而不辭躬履盜跡而無諱者也豈若世之亂臣賊子畏影而自走所爲近

在一身而其禍未嘗不流四海嗚呼與其逢聖公之徒孰若跖與江也

呼保義宋江

不假稱王 而呼保義 豈若狂卓 專犯忌

諱

智多星吳學究

古人用智 義國安民 惜哉所予 酒色狎

人

玉麒麟盧俊義

白玉麒麟 見之可愛 風塵大行 皮毛終

壞

大刀關勝

大刁關勝 豈雲長孫 雲長義勇 汝其後

昆

活閻羅阮小七

地下閻羅 追魂攝魄 今其活矣 名喝太

伯

尺八腿劉唐

將軍下短 貴稱侯王 汝豈非夫 腿尺八  
長

沒羽箭張清

箭以羽行 破敵無頗 七札難穿 如游斜

何

浪子燕青

平康巷陌 豈知汝名 大行春色 有一丈

青

病尉遲孫立

尉遲壯士 以病自名 端能去病 國功可成

浪裏白跳張順

雪浪如山 汝能白跳 願隨忠魂 來駕怒

潮

船火兒張橫

大行好漢 三十有六 無此火兒 其數不

足

短命二郎阮小二

灌口少年 短命何益 曷不監之 清源廟食

花和尚魯智深

有飛飛兒 出家尤好 與爾同袍 佛也被

惱

行者武松

汝優婆塞 五戒在身 酒色財氣 更要殺

人

鐵鞭呼延綽

尉遲彥章 去來一身 長鞭鐵鑄 汝豈其  
人

混江龍李俊

垂龍混江 射之即濟 武皇雄爭 自惜神  
臂

九文龍史進

龍數肖九 汝有九文 盍從東皇 駕五色  
雲

小李廣花榮

中心慕漢 奪馬而歸 汝能慕廣 何憂數  
奇

霹靂火秦明

霹靂有火 摧山破嶽 天心無妄 汝孽自  
作

黑旋風李逵

風有大小 不辨雌雄 山谷之中 遇爾亦  
凶

小旋風柴進

風有大小 黑惡則懼 一噫之微 香滿太  
虛

插翅虎雷橫

飛而食肉 有此雄奇 生入王關 豈傷令

姿

神行太保戴宗

不疾而速 故神無方 汝行何之 敢離大

行

先鋒索超

行軍出師 其鋒必先 汝勿銳進 天兵在

前

立地太歲阮小五

東家之西 卽西家東 汝雖特立 何有吾

宮

青面獸楊志

聖人治世 四靈在郊 汝獸何名 走曠勞

勞

賽關索楊雄



關索之雄 超之亦賢 能持義勇 自命何全

一直撞董平

昔樊將軍 鴻門直撞 斗酒肉肩 其言甚

壯

兩頭蛇解珍

左嚙右噬 其毒可畏 逢陰德人 杖之亦

斃

美髯公朱仝

長髯郁然 美哉丰姿 恐使尺宅 而見赤

眉

沒遮攔穆橫

出沒太行 茫無畔岸 雖沒遮攔 難離火

伴

拚命三郎石秀

石秀拚命 志在金寶 大似河鮑 腹果一

飽

雙尾蝎解寶

醫師用蝎 其體貴全 反其常性 雷公汝

嫌

鐵天王晁蓋

毗沙天人 證紫金軀 頑鐵鑄汝 亦出洪

爐

金鎗班徐寧

金不可辱 亦忌在穢 盍鑄長戈 羽林是

衛

撲天鵬李應

鷲禽雄長 惟鵬最狡 毋撲天飛 封狐在

草

此皆羣盜之靡耳聖與既各為之贊又從而序論之何哉太史公序游狹而進姦雄不免異世之譏然其首著勝廣於列傳且為項籍作本紀其意亦深矣識者當自能辨之云華不注山人戲書

種葡萄法

有傳種葡萄法於正月末取葡萄嫩枝長四五尺者捲為小圍令緊先治地土鬆而沃之以肥種之

止留二節在外異時春氣發動衆萌競吐而土中之節不能條達則盡萃華於出土之二節不二年成大棚其實大如棗而且多液此亦奇法也

插瑞香法

凡插之者帶花則雖易活而落花葉生復死但於芒種日折其枝枝下破開用大麥一粒置於其中并用亂髮纏之插於土中但勿令見日日加以水澆灌之無不活矣試之果驗

楊髡發陵

楊髡發陵之事人皆知之而莫能知其詳余偶錄得當時其徒互告狀一紙庶可知其首尾云至元二十二年八月內有紹興路會稽縣泰寧寺僧宗允宗愷盜斫陵木與守陵人爭訴遂稱亡宋陵墓有金玉異寶說誘楊總統詐稱楊侍郎汪安撫侵占寺地爲名出給文書將帶河西僧人部領人匠丁夫前來將寧宗楊后理宗度宗四陵盜行發掘割破棺槨盡取寶貨不計其數又斷理宗頭瀝取水銀含珠用船裝載寶貨回至迎恩門有省臺所

委官攔擋不住亦有臺察陳言不見施行其宗允宗愷并楊總統等發掘得志又於當年十一月十一日前來將孟后徽宗鄭后高宗吳后孝宗謝后光宗等陵盡發掘劫取寶貨毀棄骸骨其下本路文書只言爭寺地界竝不曾說開發墳墓因此江南掘墳大起而天下無不發之墓矣其宗愷與總統分贓不平已受杖而死有宗允者見為寺主多蓄寶貨豪霸一方

西征異聞

陳剛中云成吉思皇帝常西征渡流沙萬餘里其地皆荒寂無人之境忽有大獸其高數十丈一角如犀能人言忽云此非汝世界宜速還左右皆震恐耶律楚材楚字晉卿遼人博物無所不知蓋張華郭璞輩隨進云此名角獬音端能日馳萬里靈異如神鬼不可犯也帝為之回馭又云有大鳥其一羽足以蔽千人蓋鵬類也又云西域有沙海正據要津其水熱如湯不可向近此天之所限華夷也終古未嘗通中國忽一夕有巨獸浮水窺其骨長數十里橫於兩涘如津

梁然骨中有髓竅可容竝馬於是西域之地始通中國其國謀往來者每以膏油塗其骨令潤懼其枯朽折則無復可通故耳

嘲雷忠齋

趙子昂入覲之初上命作詩嘲留忠齋云狀元曾受宋朝恩目擊權姦不敢言往事已非那可說好將忠孝報皇元留以此銜之終身云

鎖陽

韃靼野地有野馬與蛟龍合所遺精於地遇春時

則勃然如笋出地中大者如猫兒頭笋上豐下儉其形不與亦有鱗甲筋脉其名曰鎖陽卽所謂肉菘蓉之類也或謂韃靼婦人之淫者亦從而好合之其物得陰氣則怒而長土人收之以薄刀去皮毛洗滌令淨日乾之爲藥其力百倍於肉菘蓉其價亦百倍於常品也五峰云亦嘗得其少許

純色骰錢

聞理宗朝春時內苑效市井關撲之戲皆小璫互爲之至御前則於第二三撲內供純鏤骰錢以供

一笑

公主添房

周漢國公主下降諸閩及權貴各獻添房之物如珠領寶花金銀器之類時馬方山天驥爲平江發運使獨獻羅鈿細柳箱籠百隻并鍍金銀鎖百具錦袱百條共實以芝楮百萬理宗爲之大喜後知出於承受姚某者遂賜金帶一條承受者卽姚靜齋之父也

聖門本草

陳參政揆家集名亦受家傳內有怵怵集乃爲舉子時程文又以聖門十哲七十子各有爲本草無乃不可乎陳卽行之之祖也

海鯀兆火

壬午歲忽有海鯀長十餘丈閣於浙江潮沙之上惡少年皆以梯升其背齧割而食之未幾大火人以爲此鯀之示妖其說無根辛卯歲十二月二十二三間又有海鯀復大於前者死於浙江亭之沙上於是閩傳將有火災然越二日於二十四日之

夜火作於天井巷回回大師家行省開元宮盡在  
煨燼中凡毀數千家然則溢傳有時可信也此欠考耳

此即出於五行志中云海魚臨市必主火災行省  
即宋祕書省畜書并板甚多故時人云昔之木天  
今之火地也

壬辰星隕

壬辰二月朔甲子更初有大星如五斗米栲栳大  
徐徐自東而西紅光照地有聲殷殷若雷越日乃  
知墜于宗陽宮火光滿室副宮陳悅道所目擊又  
聞是曉亦墜於陽墳之昇元觀村中皆見火光後

亦無他

葉李紀夢詩

葉亦愚右丞辛卯八月初四日夜忽夢一老人曰  
汝前為文昌相坐漏泄天機遭謫能悔過當復職  
引之至通明大明二殿俾為主殿之職於是賦詩  
四章以謝及覺僅記其一云通明殿逼紫微垣一  
朶紅雲擁至尊下土小臣勤稽首願將惠澤溥元  
元於是作詩以記其事云宋時豪士石曼卿帝命  
作主芙蓉城我才比石萬無一半世虛負狂直名

年來似有喪心疾薦共引鯨辜蒼生天誅未加公  
論沸日夕惟待鼎鑊烹何哉異夢出非想忽遇仙  
老談真情謂予夙是文昌相漏泄輕舉遭彈抨毫  
令謫墮飽憂患且使兩足蹒跚行追思善步不可  
得飛昇妙術矧敢輕當時廷議祇如此汝悔當復  
惟相迎稽首老仙謝慈愍臣罪當死天子明久之  
寂滅一大樂口棺待盡無他營老仙笑許汝可教  
引領直上朝玉京通明大明二宮殿林木蒼翠堦  
瑤瓊芙蓉爛熳錦欲似帝皇錫以主殿名賦詩奏

謝九拜起玉音嘉獎傍觀榮癡人說夢聊一快我  
獨知命不少驚只恐才非曼卿敵相見慚汗應如  
傾從今閉目需帝召玉樓續記時當成兒孫自有  
兒孫福與農報國須勤耕明年壬辰二月初六卒

海蛆

李聲伯云常從老張萬戶入海自張家浜至鹽城  
凡十八沙凡海舟閣淺沙執須出米令輕如更不  
可動則便縛排求活否則舟敗不及事矣桅梢之  
木曰鐵稜或用烏婪木出欽州凡一合直銀五百



兩其鐵猫大者重數百斤嘗有舟遇風下釘而風怒甚鐵猫四爪皆折舟亦隨敗極可異也凡海舟必別用大木板護其外不然則船身必爲海蛆所蝕凡運糧則自萊州三神山再入大洋七日轉沙門島可至直沽去燕止百八十里耳

北方大車

北方大車可載四五千斤用牛騾十數駕之管車者僅一主一僕叱咤之聲牛騾聽命惟謹凡車必帶數鐸鐸聲聞數里之外其地乃荒涼空野故耳

蓋防其來車相遇則預先爲避不然恐有突衝之虞耳終夜勞苦殊不類人雪霜泥濘尤艱苦異常或泥滑陷溺或有折軸必須修整乃可行濡滯有旬日然其人皆無賴之徒每挾猥娼同處於車箱之下籍地而寢其不足恤如此

全氏孿鬼

壬辰四月二十日全霖卿子用之妻史氏史盛誕之女子先出雙足足類雞鵝乳醫知其異推上之須臾別下雙足繼而腸亦併下乃孿子也皆男子而頭

相抵髮相結其貌如獍鬼遂扼殺之母亦隨殂

押不蘆

回回國之西數千里地產一物極毒全類人形若人參之狀其酋名之曰押不蘆生土中深數丈人或誤觸之著其毒氣必死取之法先於四旁開大坎可容人然後以皮條絡之皮條之系則繫于犬之足既而用杖擊逐犬犬逸而根拔起犬感毒氣隨斃然後就埋土坎中經歲然後取出曝乾別用他藥制之每以少許磨酒飲人則通身麻痺而死

雖加以刀斧亦不知也至三日後別以少藥投之卽活蓋古華陀能剗腸滌胃以治疾者必用此藥也今聞御藥院中亦儲之白廷玉聞之盧松厓或云今之貪官污吏贓過盈溢被人所訟則服百日丹者莫非用此

種茯苓

道士郎如山云茯苓生於大松之根尚矣近世村民乃擇其小者以大松根破而繫於其中而繫束之使脂液滲入於內然後擇地之沃者坎而瘞之

三年乃取則成大苓矣洞霄山最宜茯苓往往民多盜種密誌之而去數年後乃取焉種者多越人云

葉李姓名二士

葉亦愚名李先為葉山所攻後為李性學所窘遂以此飲恨而死蓋二人正寓其姓名云

訟學業背社

江西人好訟是以有簪筆之譏往往有開訟學以教人者如金科之法出甲乙對答及譁訐之語蓋

專門於此從之者常數百人此亦可怪又聞括之

松陽有所謂業背社者亦專以辨捷給利口為能

如昔日張槐應亦社中之瑒瑒者焉

陳石澗李聲伯云

相馬法

馬之壯者眼光炤人見全身中年者炤人見半身

老者炤人僅見面耳此韃鞞相馬之法

張受益

碑蓋

趙松雪云北方多唐以前古冢所謂墓誌者皆在墓中正方而上有蓋蓋豐下殺上上書某朝某官

某人墓誌此所謂書蓋者蓋底兩間用鐵局局之  
後人立碑於墓道其上篆額止謂之額後訛爲蓋  
非也今世歲月志乃其家子孫爲之非所謂墓碑  
也古者初無歲月志之石

### 駝峰

駝峰之雋列於八珍然駝之壯者兩峰堅聳其味  
甘脆如熊白妳房而尤勝若駝之老者兩峰偏臃  
其味淡韌如嚼敗絮然所烹者皆老而不任負重  
者而壯有力者未始以爲饌也

子昂

### 解厄呪

行御史臺監察御史周維卿以言事忤權臣得罪  
遠流西北方名哈刺和林去燕京八千里周知不  
免日夕持誦高王觀世音經一夕夢有僧問之曰  
汝曾誦高王觀世音經否曰然僧於是口授一呪  
與之此觀世音菩薩應現解厄神呪也特誦一萬  
二千遍可以免難夢中熟誦及覺卽書之紙自是  
持誦不輟無何得還燕京而權臣怒猶未已復繫  
刑部獄周在獄持誦益勤未幾遣使雲南以自贖

至彼合蕃僧加瓦八遍閱大藏經得梵本呪比夢  
中惟欠三字未幾權臣誅遂除刑部郎中還其妻  
子財物人以爲誦呪之力云呪曰

答侄他

侄者只他音

唵呿罷吡哆

呿吡音他

呿囉吡

哆 呿呵吡哆

羅呿吡哆

囉呿吡哆娑呵

### 霍山顯靈

杭之霍山張真君祠宇雄壯香火極盛自兵火後  
漸致頽圯此役甚大人無復問之者辛卯朱宣慰  
運米入京自登萊拋大洋三神山轉料以往忽大

風怒作急下釘鐵猫折其三四柁幹鐵稜軋軋有  
聲欲折一舟之人皆分已死主者露香望空而拜  
乞命忽於黑雲中震霆有聲出大黃旗上書霍山  
二字於是舟人亟拜許以再新殿宇以答神呪須  
臾風濤貼然遂獲安濟是冬入杭遂捐鈔千錠崇  
建鼎新云

### 黃蘆城幹

長城之旁居人以積雨後或有得堅木於城土中  
識者謂名黃蘆木乃當時用以爲城幹用者性極

堅勁不畏水溼而耐久至今一二千年猶有如楹  
大者以之爲鎗幹最佳蓋築城無以爲幹不可所  
謂不謹而寘薪焉者又何邪

受益

癸辛雜識續集上

終

